

Meeqqat atuarfianni, inuussutissarsiutinut, ilisimatusarfimmi il.il. ilinniartut ilitsoqqussaralugit kalaallisut oqaatsitik atorlugit inaarutaasumik misilitsittarnissaasa allatulluunniit misilitsittarnissaasa qanoq qulakkeerneqarsinnaanera pillugu apeqquteqaat aallaavigalugu oqallisissiatut siunnersuut?

(Inatsisartuni ilaasortaq Jens Napätôk', Naleraq)

Akissuteqaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Inatsisartunut ilaasortaq Jens Napätôk', Naleraq, Meeqqat atuarfianni, inuussutissarsiutinut, ilisimatusarfimmi il.il. ilinniartut ilitsoqqussaralugit kalaallisut oqaatsitik atorlugit inaarutaasumik misilitsittarnissaasa qanoq qulakkeerneqarsinnaanera pillugu apeqquteqaat aallaavigalugu oqallisissiatut siunnersuuteqarnera pillugu Naalakkersuisut sinnerlugit qutsavigaara.

Atuartut ilinniartullu ilinniartoqarfitsinni namminneq oqaatsitik atorlugit soraarummeersinnaanermik neqeroorfigineqarsinnaaneranik sulissuteqartariaqartugut siunnersuuteqartoq Naalakkersuisunit isumaqatigaarput. Taassuma tungaanut suliaqarpugut, tassungalu sammivimmut tamatigut alloriartoqartariaqarpoq. Inuussutissarsiutitigut ilinniartitaanerni soraarummeertoqartillugu oqaloqatigiinnermi soraarummeertup, nalileeqaataasup soraarummeersitsisullu akornanni peqataasut tamarmik kalaallisut oqalussinnaanngippata assersuutigalugu toqqaannartumik oqalutseqarneq atorneqarsinnaavoq. Imaluunniit taaguutit oqaatsillu nalorninartut pineqartillugit misilitsittumut, censorimut misilitsitsisumulluunniit oqaatsitigut ilisimasalimmik tapersersortimilluunniit ikiorteqartitsinikkut.

Pingaartumik ingerlaqqiffiusumik ilinniarfinni ilinniarnertuunngorniarfinnilu kalaallisut misilitsinnerit tamatigut neqeroorutigineqarsinnaaneq ajorput. Ingerlariaqqiffiusumik ilinniarfinni immikkut oqaatsit suliamut tunngasut annertuumik atugaasarput. Ilinniarnertuunngorniarfinni ilinniartitsissutit assigiinngitsut 40-it pineqarput, matumani ilinniartut 300 sinnillit aasat tamaasa ilinniartitsissutini arlalinni oqaluttariarsornikkut allattariarsornikkullu misilitsittarput ilinniartitsinerlu amerlanertigut danskisut ingerlanneqartarluni.

Atuartut ilinniartullu misilitsinnerni atugaannik sapinngisamik pitsaanerpaamik qulakkeerininniarluni, siunissaq qaninnerusoq ungasinnerusorlu eqqarsaatigalugu aaqqiissutinik suliaqartoqassaaq.

Siunissaq qaninnerusoq eqqarsaatigalugu misilitsinnernut atatillugu oqalutseqartitsineq atorneqarsinnaavoq, oqalutseqartitsinerli aaqqiissut pitsaanerpaanngorsinnaanilu

attatiinnarneqarsinnaanngilaq, taamaallaalli piffissami sivikitsuinnarmi aaqqiissutaagallarsinnaalluni.

Matumunnga atatillugu oqaatigineqassaaq, allamik oqalutsit atuinermi misilitsittup akissutaasa imaluunniit misilitsitsisup apeqqutaasa tamakkiisumik eqqortumik nutserneqartannginnissaa aarlerinaammik annertusititsissamat, tamanna taamaalilluni inaarutaasumik naliliinermut sunniuteqarsinnaalluni.

GUX-imi, ingerlariaqqiffiusumik ilinniartinnit assersuutigalugulu niuernermit ilinniartinnit atuartitsinermut malinnaasinnaaniarnermi pisariaqarpoq, ilinniartut kalaallisut oqaatsit saniatigut oqaatsinik allanik 1-2-nik paasisinnaanissaat, soorlu maannakkut qallunaatut tuluttullu.

Atuartitsineq kalaallisut ingerlasaraluartoq, pingaartumik ingerlariaqqiffiusumik ilinniartinnit atuartitsinermi atortut tuluttut qallunaatullu allassimasut atorneqakkajuttarput.

Peqatigitillugu ilinniakkani qaffasissutsini tamani sulisinnaassutsikkut imminut pilersorsinnaanissaq siunertaralugu suliniutit pisariaqarput, oqaatsit tungaasiguinnaanngitsoq tamanulli tunngatillugu suliniuteqarnissaq pisariaqarpoq. Ilinniartitsisut kalaallisut oqaasillit amerlisarnissaat suliniuteqarfigineqartariaqarpoq peqatigitillugu kalaallisut taaguusersuutit ineriartortissavagut, taamaalilluni ilinniartitaanernut tamanut ataqatigiissillugu nammineq oqaatsit ilitsoqqussat atornissaanut periarfissat nukittorsarneqartuassapput. Naalackersuisut tamatumunnga atatillugu UKA 2021/46-mut Naalackersuisut akissuteqaataannut, kiisalu immikkoortup taassuma siullermeerneqarnerani allannguutissatut siunnersuummut Naalackersuisut saqqummiussaanut innersuussissapput. Naalackersuisut allannguutissatut siunnersuutaat ima oqaasertalerneqarpoq: ”Ukiut qulit ingerlaneranni ilinniartinnit ilisimatusarfimmilu ilinniartitsisut malunnaatilimmik amerlanerusut kalaallisut ilinniartitsisalernissaat anguniarlugu periarfissat suunerinik Naalackersuisut misissueqquneqarnerat pillugu Inatsisartunut aalajangiiffigisassatut siunnersuut. Misissuineq UKA2022-mi saqqummiunneqassaaq.” Allannguutissatut siunnersuut akuerineqarpoq.

Naalackersuisuniit taamatut oqaaseqarluta inersuarmi soqutiginarumik oqallittoqarnissaa qilanaaraarput.